

Richdich platt

Jetzt habb ich vor e paar Daach iwwer de Friehling in Flerschem geschriwwe – sogar inner Fremdsprooch, wie de Karl gesaacht hott, nemlich dem scheene Wetter oogemesse in Hoch-Deutsch – unn schunn kann ich mich widder uff Platt uffreeche.

Unn desdeweche, weil se om Dunnersdaach hinne in de Kapellestroos, uff dem kloone Grün-Inselche zwischem Hochhaus unn em Mimmo-Italiener, so zwaa richdich scheene Beem - ich glaab, dess sinn bis vorgestern noch japanische Kerschbeem gewese! – entkleid, ampudiert und skelettiert hawwe. Alles was on dene Beem nooch Lewe ausgesehe hott, hawwe e paar Männer, ich nemm oo vom städtische Bauhof unn gonz sicher nit ohne Ufftrach von ihm Chef, mett ihrne Kettesäcke unn Bolzeschneider zersächt, zerschnippelt unn in de Konteener geworfe: Fort mett dem Zeich, fort mett jedem Ast, jedem Zweich unn jedem Blatt, die Beem hawwe gebliet, die Blüteblätter mache nor noch Dreck, also ab demit, macht alles richdich platt unn glatt! Unn jetzt strecke die zwaa Beemstumpe de Rest von ihrne abgehackte Gliedmaße in de Himmet, unn wennse kreische kennte, dete se kreische, weil mer se nit nor total skalpiert, naa, sogar noch als Marterpfähl hott stehe losse.

Ja als Marterpfähl, denn dess Geripp martert werklich jed Aache! Mir unn aach so e paar Veechel sinn die Träne kumme, mir, weil so e unverständlich Arweit mir moi Friehlingslaun verderwe dut, unn de Veechet, weil se grad mett Nester baue oofonge wollde.

So, jetzt kann merr saache – unn irgendooner werdd dess saache -, Honnes, du hosd koo Ohnung, warum dess grad jetzt unn nit im Herbst gemacht werrn muss, dann, wenn die Blätter gefalle sinn unn die junge Veechel ihr Nest verlosse hawwe. Es kann joo soi, dass es ferr soo e Baumentkleidung, soo en barbarische Baumstriipties, wie ferr alles, was von owwe oogeordend werd, e Erklärung gibt, kann joo soi. Awwer die Stadt gibt so vill Geld aus ferr Informatione, dass de heit schon waaßt, was im Juli uff de Gass unn im Flerschemer Keller los iss. Awwer warum kann merr nit emol ins Blättche schreiwe – unn doodeferr braucht merr koo Pressekonferenz unn aach koo Notiz on die FAZ odder de HR3 –: Ihr Leit, bei eich doo drausse werrn on zwaa Beem alle Äst abgeschnitte, weil ... unn dets e bisje erklörn. Dann det mers villeicht immer noch nit versteh, awwer merr wüsst e bisje was. Unn wenn alles soi Gutes hott, so aach die Sach mett dene Marterpfähl: Nit nor die Häupling wisse dann was, sondern aach die Indianer.

Eiern Honnes